

安慶府志

〔清〕康熙六十年

下

中華書局

安慶師範學院
安慶市地方志編纂委員會
整理

安慶府志

【清】康熙六十年張楷纂修

下

中華書局

安慶府志卷之十八

鶴城張楷蒿亭纂訂

人物志

篤行

張楷曰：篤行有差等。上者夫子之行，謹「慥慥」、「遯世」、「不悔」是矣。及門如柴之愚、參之魯、由之喭，皆至性過人，卽謂之篤行可也。夫子與子貢論士，有耻、孝弟、硜硜，孰非篤行之旨，而廣狹分焉。子張問行，語以「忠信」、「篤敬」，極之參前、倚衡，此「曰明」、「曰旦」之精義。試思曾子「臨深」、「履薄」，至「知免」之時，似可一息放下，而易簣一事，却又添多少勇猛。論篤行者，當知此義矣。然愚夫婦，率其天性，勤勤懇懇，尺寸不渝，罔求人知者，又不可少其人也。若孝友，若醇謹，若好施，或能爲人所不爲，忍人所難忍，皆篤行中一節。今皖志所載多此，良亦風世化俗，不容廢也。《詩》曰：「高山仰止，景行行止。」吾願勉之，願與皖人俱勉之。

篤行傳

懷寧

明

游於禮 號文江。以諸生入太學，任山東經歷。爲人正直不阿，三十載不入城市。荒歲散穀賑鄰，施棺以殯無主者。賦詩樂道，悠然自得。沒後，鄉人祈報必祀之。子士進，以明經任峨嵋令；孫必勝，以明經任涪川令，皆忠厚不忝世德云。

咎學易 號心源。萬曆癸酉舉人。性儉朴耿直，取與一介必嚴。絕意仕進，不謁公府，任世變紛華，而澹然自守，終身如一日。授金谿縣令，不之官。古稱獨行君子，庶不媿矣。生平至孝，強仕時，父已耄，依依枕被如孺子慕焉。

江見龍 號兩寰。其父雲，質行淳古，遇人貧乏患難，亟爲周卹，多隱德。以龍穎敏，訓飭甚謹。偶見墨吏彈章，戒龍曰：「讀書臨民，如若所爲，得罪神明矣，汝識之。」故龍操行嚴正，幼習已然。年十三，應童子試，論題爲「天之曾子」，《西銘》乃「天之宗子」，衆譁，以爲誤。龍曰：「非誤。《朱註》云：『體其受而歸全者，天之曾子也。』」衆歎服。爲諸生，清介自勵。嘗讀書古祠中，屋材朽落，會天雪甚，同舍生欲取以燎，龍毅然止之。爲文法大蘇。舉萬曆甲午鄉試，爲李廷機所拔士。後授閩南平令，首重諸士廷謁禮，勉以氣節。未幾，引疾乞歸，無以爲裝，胥吏持羨進，龍曰：「不治其事，敢貪其利乎？」却之。卒年六十五。生平篤孝敦行，可爲後法，皖人士推典型焉。子夢佳，饒邑庠，博學善屬文，早歿。長子夢鶴，領乙卯鄉薦，歷任廣信府同知。

程泰亨 字子治。父縉雲令卽世，亨甫及冠，杜門下帷，無間寒暑。讀書必窮闕奧，聲滿一覺。產業悉聽伯兄主之，及析箸，無少較量。季弟旣出繼，仍推畀取均焉。生平坦直無城府，不事華靡，不近權貴，不言曖昧事，恂恂如也。以明經歷解州學正。州守扑士，令士囚首質成。亨抗言，責守無禮，遂謝官歸。其風節高邁如此。

宣 塋 字明瞻，號凝齋。舉明經。賦性仁孝，家世素豐，分產以膏腴讓伯季。遇凶年，輒施粥賑飢。初無子，買妾方入室，見女有威容，詢之，言係維揚名家子，塋驚而憐之，卽別處一室。詰旦，召其父母還焉，聘金服飾俱弗取。初授滁州訓導，轉寧

州學正，俱捐俸作課，其識拔者，率登賢書。兩學諸生俱立石志去思。

顏從仕 字修之。弟從心，字開之。家世尚理學，蚤歲同爲諸生，雖華胄，澹如寒素。仕事親至孝，年六十餘，母疾，猶躬自浣垢。諸弟奉若嚴師。閨門相敬如賓。心授經得俸，悉助菽水。其居在江潯，終日誦吟，非慶弔祭掃，鄰里罕覩其面。仕口哦手錄，寒暑無間，丹黃書籍近萬卷。心尤工楷法，寫書亦數百卷，各封識以貽其子。仕於崇禎己巳，舉明經。子渾，登庚辰進士，浩，領丙子鄉薦。

洪雲翼 號望冶。博洽工文詞。性慷慨好義，遇公事輒發憤上書，當路每聽之。萬曆中舉明經，任浙江宣平令，著能聲。解組蕭然，賣文自給。壽九十有三。

高材 字世篤。幼失恃，有異母弟妹，父憐愛特甚，材篤伯奇、子騫之孝，內外無間言。父卒，悉舉囊中裝付弟妹，無異同母，人以是高之。

陳尚煒 字奕南。邑庠生。惇厚周慎。家籍舊隸於軍，煒費千金，置義田，給勾補，不累其族。喜子弟讀書，愛群從如己出。孝弟力田，煒其人矣。

魯士龍 號見陽。郡庠生。博學能文，醇謹自愛。館於巨室，盜劫主人，而遭所劫於途，士龍鄰人拾之歸。主人廉其跡，以鄰爲盜也，訟之。士龍亟白主人，得釋。又，大司馬田洛，出其祖希周之門，士龍以公道，復一衛弁世職，無所利焉。至今，其子孫猶頌德云。

方應聘 字起伯。由廩例游成均。束修砥行，持身嶄嶄，居家孝友，內外無間言。性介直，不輕爲然諾。族有不自振拔、流落大姓者，聘扶掖之，力使歸宗。故人陳卜微遊宦於蜀，貸富室千金，聘子都韓質其事。後陳宦況蕭澀，不能償，富人責償於韓，曰：「吾以君父子信義素著，故輕付千金，豈知有陳氏耶？」聘即命子變產代完。陳歸益困，略不取償也。

高樞 號象乙。弱冠遊邑庠，窮經課士。孝事父母，動合於禮。壬子，省試策，觸忌被乙，遂以括帖付之後人。至其以書舍遜伯兄，嫁亡母愛婢，不忍役，迎養寡姊，還從兄之遺金，爲善於家者，不勝紀也。風度端凝，足爲人倫程式。至今數十年，故老猶指其廬曰：「此高先生居」云。

李芝奇 號西樵。邑庠生。內行純篤，潛心舉業，自中萬曆辛卯副榜之後，絕意選舉。所著《易經質疑》，悉本《大全》，參以己意。

晚年益規矩先民，和平樂易，人號長者。傳書教子，淡然以終。

劉胤甲 邑庠生。號若谷。性孝謹仁恕，澹於嗜慾。父應幕之粵，其學業多成自母教云。受郡守連繼芳、邑令吳之才特達之知。

辛酉，叔父母無嗣，病篤，遂不應鄉試，侍湯藥、營葬，一如人子禮。推菱湖公田讓之族兄以弭爭。生平無忤色於人，足跡未嘗一至公門，其公服三十年如新也。豫章艾南英極賞其文。所著有《他山中江草》。

王道溥 與其弟道達幼孤，母壽近期頤，兩弟兄行年七十，孺慕不衰。常於北堂前，引諸孫擲梨棗爲樂，以娛其親。家不析箸已三世，鄉閭皆稱「孝義王家」。溥廉貧長者，不爲祿仕達，尤有聲膠序云。

謝嗣恩 字莫京。邑廩生。早失怙，事母至孝。爲人真率，誠樸無僞。博士兩舉德行於學使者，皆膺上賞。從弟推恩，亦孝友純篤，爲隱君子，時稱「二謝」云。

聶廷鼎 字襄宸。少負大志，積學淹通，以數奇遇窮，至老猶手不釋卷。生平持方守正，行類先民。嘖笑弗輕，然諾必踐，事之可否，從未少有轉移。復渾厚性成，揚善掩惡，至取與之際，纖芥必嚴。然人有困乏危迫，未嘗不損己周之，竭力援之也。嘗自謂：「我不能留產業，但有方寸地耳。」年八旬無疾而卒。

曹司秩 字命六。讀書敦古，持尚名節。以父卒於官，不得終養，遂無仕進意。事母以實孝，不修具文。生平於義利之介尤晰。有徽商及豫章人，曾寄重貲，後數年始取歸。此事甚細，然貧賤視其所不爲，司秩以布衣能若此，故足述云。

汪廷侃 字司直。其先爲越國支裔，客於皖，遂爲懷寧人。侃有隱德，讀書養晦，及升諸邑學，遂爲時所知名。飭廉隅不喜奔競，繩趨矩步，鄉先達重之，樂與遊處。所著書有《經濟彙語》。且能察機祥云。

戴光祖 字伯繩。明經，任池州學博。立行純篤，嗜古能文，尤精於《易》。每談論風生，聽者頤解。與朱國熙、韋文炤稱至交。國熙性孝，博通經史，爲名諸生。炤字中素，領鄉薦，六合訓導。三人皆閭修之士云。

曹庶 號明軒。天性孝友。父早歿，事伯兄，飲食必問，寒煖必察，數十年無倦容。立心不愧形影，常拒隣婦於暗室，惠偷兒以錢米，其正直寬厚，有大丘彥方遺風焉。孫士駒，歲貢生；士奇，登康熙壬午賢書。

莊可象 於崇禎辛巳大荒之年，拾遺金於通衢，時絕糧已數日，必待其人還之。

國朝

胡 璉 號甌城。邑庠生。師事阮堅之，友事白瑕仲，相勉以仁義。抱奇不偶，守道安貧。卒年八十餘歲。

蔣延姬 字孔緒。邑庠生。父蚤喪，家貧，嗜學不倦，能孝於母，友于其兄。爲文規模先正，不徇時好，故屢試輒蹶。隱居教授，嘖笑不苟，師嚴道尊，鄉大夫奉典型焉。從遊諸子弟，多所成就。晚益明性理，有《視履考》、《門山草堂集詩》。

江一傑 字迪元，廣文之鯤子。六歲失恃，長入里塾，誦經書皆曉大義。爲人誠朴敦厚，輕財好施。年八十九，矍鑠如少壯，無疾卒。

錢有達 號象崑。幼孤，事母極孝。母病，哭侍湯藥，嘗糞甘苦，宗族稱孝。崇禎壬午，疫，有潛嫗攜將笄女嚮以自存，達值歲暮解館，遇道旁，問得故，即取束修數金與之，使骨肉完聚。次年，仍令歸原聘王氏子，里人頌義。子選成，乙丑進士。孫鵬，甲子登賢書。

劉一魁 號星寰。性至孝。其父繼芳卒，年八十一，魁猶哀毀骨立，至歲時思親，雖耄耋必垂涕。生平惟知積善，矜孤恤寡，周急濟困，以及全嫁娶，助棺槨，焚借券，皆委曲行之。壽八十有七，薦列鄉飲賓。目覩五世孫，尤親見其子光祖以耆德與賓筵，論者咸以爲六皖所少云。

劉光祖 字耀先，鄉飲賓一魁之子。孝友樸誠，積善好義，悉如其父。前後焚券約免二千餘金，感恩者立木主祀之。值修邑庠，遠市材木襄事，德重賓筵。子澡、沅，俱明經；汧，文學。曾孫阮，康熙甲午舉人。

汪之濟 字舟子。邑庠生。孝性天成。乙酉城潰，抗賊負創，救父難。母得危疾，輾轉牀褥，如嬰兒不忍刻離。居喪哀毀，數不欲生。善事庶母如母。慷慨好施與。歲荒，同里不能舉火者，夜啟其戶，密周之。遠人告貸，悉應無難色，讓水、焚券，彝行種種，屢經舉揚，始終絕無間言。

張天澤 字乾裔。性至孝，舌耕茹菹，而甘旨不缺於親。潛心制藝，試冠童子軍者三。鼎革以後，精岐黃業，凡貧不能醫者，多以藥全活之，不計其利，鄉黨頌義焉。著《行素齋秘要》、《脈宗管見》諸醫書濟世。生平誠朴無偽，不事逢迎，而人愛敬其

德。年九十，豐頤健步，有司旌表其壽。是年卒。

孫之佑 貿易石牌，素有孝行。母好施與，積金于橐。康熙十年辛亥，奇荒，佑承母志，銀米分贈貧窶不倦。且全人破鏡。鄉里間多頌德焉，有司旌其門。

胡以孝 亦貿易爲業。康熙辛亥冬，道殣相望，孝捐米約五百石，分贈鄉城貧乏，一時懽聲載道。有司旌其門。

黃在中 武庠。於康熙庚戌冬，拾遺金五十兩，訪其人還之。府授莊名弼出示學門，旌賞其義。

朱志光 爲人誠篤好義。曾拾遺金三十兩，訪失者歸之。其人至，曰：「余所遺五十金，何僅還此？」志光亦不與辯，遂解橐以足其數。後其人復得所遺於他所，且感且愧，志光之心始白，里中稱其厚德焉。

陳禎祥 佑聖觀道紀。於鐘簾下得遺金二百餘兩，祥封書「上帝鑒觀」四字，以待失者。其人至，悉還之，不納其辭。知府杜繩申詳院，給冠帶旌之，扁曰「還金美德」。

王世文 號象明，前歲貢生王焯嫡孫也。生平孝友，修行束身。閭里間，誠樸有古風，鄉黨式其德望。康熙辛亥歲飢，諸臺憲煮糜以活飢民，世文鬻田助五十金，以勸其費，當事賢之。後以耆德舉鄉飲賓，守令旌以扁額。年七十八卒。子國鼎，郡增生。

咎弘祖 字寅谷，號僅齋。前增廣生。性醇篤孝，事繼母，母虐楚，無幾微怨色。母病，侍湯藥，三月不怠。母爲感悟，臨終執弘手泣曰：「汝孝至矣，吾爲汝冥禱多生貴子以報。」弘異母弟張祖出繼伯父後，遺產甚薄，弘分己產均焉。早歲，博極典籍，旁及醫卜諸書，文名日著。池陽吳次尾（二）曾招人復社，不入，蓋預知黨禍之將作也。明末，弘有顯戚當國，愛弘才，遽以五品爵題授，弘力辭不就。又厚贈千金，亦揮不顧。其耿介如此。治家嚴肅，無嬉笑容。中年卜隱水鄉，不入城市。晚結茅龍山深處，幾不蔽風雨，粗布脫粟，恬如也。年七十有八，無疾而卒。長子霽林，令會稽，贈如其官。次子茹穎，壬辰進士，內閣中書。

徐可輝 字文炳。幼失怙恃，事伯父母無異所生。伯父病，侍湯藥，衣不解帶者匝月。養生送死，始終無懈，里人咸以孝稱。生平

〔二〕尾：底本和成文本字跡模糊，今據《江城名蹟》卷二和《學餘堂文集》卷二十三校訂。

慷慨，好施與。有游姓者，欠魚課，追迫，以子質，輝與兼金十兩完官，不役其子，骨肉得全。又有王姓者，貸銀三百兩，貧不能償，因喚其人，以原券還之，曰：「恐余子孫執此爲口實也。」他如夏施茶、冬施棉、死施棺槨者，不可勝數，誠不愧篤行君子云。子光運，郡庠生。

周文典 字峻之，嘉聘之仲子也。性純摯。乙酉城潰，母何氏以殉夫，殲於賊。文典從斷溝荒塹間尋母殘骸，不具，呼號累晝夜。歲時祭祀，必涕泣，或夜形於夢，覺來枕衾猶濕，至老不渝。平生以禮自律，曾有餌以美妓者，竟夕不敢近。尤喜施與，視人窘乏，如疾痛在身，有告者，無不響應。開誠布公，與物無忤，族黨交重其爲人。子偉，中康熙戊子經魁。

陳蔚 字豹渭，號南庄。少穎悟，讀書畧曉大義，能出己見，翻前人窠臼。爲文章，務純正。性篤至，兩兄早逝，奉母獨養，甘旨不缺于供。所餘館穀，爲諸姪營嫁娶，諸姪咸賴以生。豪于飲，自謂得酒中趣。不修邊幅，廓如也。康熙壬午，領鄉薦。癸巳萬壽科，已擬中，數日，因額溢復置，志願未及大售。年五十三卒。同年，郡守張楷親詣吊祭，經紀其喪。女二人。遺腹子一，又疹殤。遠近聞之，有伯道之嘆云。

任堦 字德音，號逸園，大參國楨之孫，贈僉憲之燦之子也。承先世累葉簪纓，兩兄堦、塾，俱宦遊。堦負性簡淡，不慕榮利。弱冠遊庠序，而寄情詩酒，曠懷高致。凡利人濟物之事，無不殫力爲之，《詩》所謂「淑人君子」也。所著甚富，有《逸園方書》行世，利濟無窮。

諸應震 字天傑。幼失父，事母曲盡孝道，承顏順志，四十年如一日。伯兄早卒，事丘嫂，養之終身。撫諸孤姪如子，婚嫁力爲經營，復分田產給之。里中有不平事，質之應震，立解散，蓋盛德之服人久矣。貧親友借貸焚券者，不一而足。皖人士奉爲典型焉。子正達，歲貢生，正述，拔貢生。

任垣 字濯公。邑庠生。年十二，城潰被擄，有江右賈客黃德明奇其貌，贖歸。後德明舟覆，全家流寓儀真，訪得其跡，具舟楫迎至皖，分屋與居，生養死葬無缺焉。兩兄堦、塾通籍後，從無片紙干人。惟魚課老冊無稽，奸滑任意飛詭，垣搜陳弊竇，上之靳大中丞，疏題畫一，至今賴之。伯兄觀察粵東，屢招不至，聞被誣解任，則星奔營救，往還四年，誣卒得白。垣在粵，贖難婦葉氏，還之其夫。同里馬生客死，收殮，給資回里。善狀甚夥。居鄉正直，僉人愧至其前。尤篤友誼，推解不倦，三黨姻親賴以舉火者甚衆。生平類多隱德。卒年六十有六。子五人，俱列黌宮。長子奕銓，久食餼，力學植行，士林

咸推重焉。

王民戴 字元厚。伯兄早逝，撫姪如子，爲婚娶，均產業。順治四年飢，戴于太平里約好義者倡設粥廠，時藉以全活者不可勝計。

巡按潘公旌以「義高閭里」，郡守王公以「素履無愆」表之。屢舉鄉飲，辭不就。年七十一無疾卒。

金鼎相 字雲六，號念菴。幼穎異，博覽群書，試輒冠軍。學博程之明，以名進士操江南月旦，見相人文，嘗有「淵渟嶽峙，璧潤珠圓」之目。父懋謙，早逝，相以不得事父，時時飲泣。事母黃氏，承顏悅志，定省不懈。乙酉城陷，母抗節死，鐵佛菴，相痛哭欲絕。後見家人持刀器，輒怛怛心動，終身不用寸鐵，值誕日忌辰，必茹素悲哀，五十年如一日。平居持身以正，接物以和，敬祖睦族，扶危濟困，懿行不可枚舉。卒年七十有五。子永，歲貢生。

張麟 字彥升。歲貢生。學根夙慧，孝本性成。善承父志，事繼母一如所生。下筆千言立就，無不貫穿經史。註《太上感應篇》，以振聾聵。更做紫陽遺規，倡捐米稻，欲行社倉良法，以備水旱。持躬謹言慎行，不愧衾影，當事目之爲經術醇儒，良不虛也。年七十卒。子維嶽，廩貢；維垣，維型，俱庠生。

任堡 字雉萬，一字衛公，邑庠，贈大參之燦少子也。天性純孝，甫數歲，執父喪如成人。事母方宜人，色養有加，侍疾，衣不解帶。晚年營葬，直經匍匐於霜雪中，廬墓三月，夜輒跪墓前號泣，掖之不能起。事諸兄友愛恭謹，至白首無間言。生平淡泊寧靜，遠於權勢，胸襟瀟灑，天真爛漫。濟人之急，而口不言貧；折人之過，而背無私議，表裏如一，有古君子風。覽湖山之勝，詩酒自樂，無日不開口而笑也。喻大中丞顏其亭曰「樂此天真」，蓋紀實云。

劉前彬 字又彬，號劬山。邑庠生。居父母喪，俱廬墓三年。建陟望臺、永思樓，以祀莫之。精研《易》理，四方就講者甚衆。郡守姚公欽彬望，凡講約教條，悉出其手。文章德行，素重士林，督學李公是以有「文行兼優」之舉。至於贈紀姓人以蘆洲、白趙孝廉之誣枉，敦倫睦族，敬姊愛弟，尤大彰明較著也。年七十六卒。

陳循 字奏言。以康熙甲戌武進士授溧陽營守備。性至孝。母氏七旬餘，備極色養，承順無違。伯兄燮早卒，孤姪維塾方六齡，撫如己子，長養婚配，至於成人。未幾，維塾亦卒，存遺腹孤姪孫在銓，撫摩鞠育，飲食教誨，恩義尤篤，俾得成立。循爲人正直剛方，是非不阿，然諾不苟。有爭訟者，不憚竭力排解；貧不能婚娶者，不惜捐資補助；親戚鄉里爭相推重焉。濮世珂 字我榮。郡增生。性好施與。歲飢，珂出麥米，賑貸鄉里，北運至淮，見鳩形載道，捐米募同事助之。有羅姓者，侵官課

二十餘金，將鬻妻以償，珂爲捐金如數，俾得完聚。其篤行類此。

許維藩 廩貢生。嗜學能文，重然諾，敦氣誼。兩親好義，喜周濟，藩承其志，不少懈。仲弟夫婦早逝，遺子女，撫如己出。有隣人某，貧甚鬻身，其婦將自盡，藩聞，急爲贖歸。生平樂善，其家訓也。年六十五卒。

張清誼 字正其。宅心忠厚，敦崇孝弟。嘗拾遺金，訪其人還之。族有貧不能婚，子弟無膏火者，解囊相助。處里黨，卑以自牧，從無疾言怒色，亦不作欺人語。至卹灾救患，善行不可殫述。年七十五卒。

桐城

漢

時公 曾爲邑令，逸其名，休致於家。以禮義導化民間子弟，子弟感之，立亭曰「時公亭」。

元

方德益 元末，自池口徙桐，以好義稱。所居鄰學宮，前衢隘，割居地之半以廣之。桐溪水出龍眠，暴漲，則激石漂木不可渡。德益捐金甃石，橋成堅緻，迄嘉靖末猶賴之。後子孫簪纓不絕。

明

胡宗舜 字敬夫。邑諸生。鄰有胡登者，竊薪，其僕遇之，交惡。登毆僕死，有司論法當抵。宗舜曰：「登吾鄰也，其先人不可無後。」求釋之。

金騰高 字上達。任俠好義，急人之困。邑大飢，騰高積穀二千石，悉出賑其鄉里，曰：「所貴夫好義者，補天地之不足也。豈其乘歲浸而自爲利乎？」詔旌其門曰「義民」。

李璽 字廷玉，順天籍，桐城人。其友汪冕赴廷試，病於邸，囊有百金付璽，人無知者。冕卒，乃爲治棺斂甚備，自主其喪。召冕

子至京迎喪，因以父金還之。

錢元道 有種，商主其家，既去，除室見有遺金約二百餘，度商已遠，乃置倉中，積穀壓之。次年，商復至，言別後三日覺囊金失，不知所。元道曰：「此非途中失也。」發倉示之，囊括宛然，遂還之。

朱東 字漢卿。貢生。晨詣學，見道旁有遺金，東不顧。僕曰：「後人不攫之乎？」東命收，約二百餘金，以聞於校官。出示招之，則糧役王姓者之遺也。王請分。東笑曰：「天欲損爾，豈令我見之？速挈去，毋我溷。」

程希學 字子敷。嘗以赴試過香爐寺，如廁見遺篋，有金百餘兩，收之，居不去。僧曰：「文宗且至，何乃逗遛？」希學曰：「吾與友約，姑待之。」三日，失金者哭而至，曰：「以吾父之嚴而失稅金也，進不勝官刑，退不勝父刑，死矣。」希學出而還之。

方綽 字維裕。太學生。父寵衛氏，篋資而奔，置不問。從兄絢貲豐，嗣裔繼綽子吾，業承重矣。爭立訟起，綽曰：「我不能舍子而脫道旁壁。」遂以吾還。平居好施，里人待炊者衆。歲飢，出千餘金航楚穀賑其鄉里。年七十卒。

張一輪 字侶仲。少負才思，慷慨好義。年五十無嗣，鄉人坐法，請以女侍巾櫛，一輪曰：「吾不忍乘汝危而納汝女也。」贈之金而遣之。後爲江寧學訓，以百金出人於獄，不責償。及諭泰安，有皖上賈人遇兵，寄金若干。越五六年歸，其人已死，乃悉還其子，封識宛然。

方夢暘 字子旦。太學生。居鄉和易。父歿，債未收者餘千金，夢暘悉焚券。有族人之僕，馳馬驚鄰豕，墮地懸鐙曳傷，而豕亦亡矣。鄰索豕，族人究傷僕，交詬不已。夢暘曰：「奈何以意外事構難？」引僕於家，藥食月餘，傷痊。出錢五百償豕。嘗渡江，舟人失金，相爭。夢暘謬曰：「適吾僮得遺，必爾物也，風急，幸無譁。」抵岸，分囊償之。已，舟人得金所在。乃諭之曰：「金，微物也，倘爭而溺，奈何？寧謬償耳。」人稱爲長者。官南安丞，有治聲。

方體乾 字青林。力學工詩文。以明經老，非志也。生平惟克志堅忍，雖橫逆，怡然受之，其人不可化，亦飲醇酒自寫鬱陶而已。曾過橋，醉人擠於水，乃拂衣去，曰：「彼醉矣，何傷？」會有鬻妻完租者，盡豁，令其完聚。偶置產，增直與之，仍贈遺且厚。督學周師旦舉德行，邑令旌之曰「種德光先」。疾革，屬其子畿曰：「汝存心惟仁慈涉世，惟忍與讓乃爲養德。」後其子爲刑官，一以仁慈爲鵠云。

左仲良 嘗因歲飢，出五百金糴米於楚，以賑其鄉人。有翁姓者，舉族疫，業斃五人矣，皆無棺，存者不能輒起。仲良夜使家人，昇

五棺置翁門外而去。旦啓門，見之大驚，意必仲良之所賑也。遂收其死者瘞之焉。

吳道謙 字牧之。邑諸生，以孝弟謹厚稱。居喪三年不露齒笑，撫幼弟道約友愛有加，與諸生笄光宏善，捐貲急難，士林頌之。

潘暎軫 字楚星，少司馬汝楨長子也。萬曆間諸生。是時，桐仕族鼎盛，子弟尚華侈，逞機智，或有以多才反累家聲者。暎軫任真推分，儉約如寒素，閉閣讀書，即家人生產，漠不置問。其於勢位熏灼之場，視之尤蔑如也。故稱佳公子，無間言者，惟暎軫焉。子金芝，太學生，亦淳謹有父風。

王爾賓 字晉雲。天啟間邑諸生。天性渾厚，力學沈篤，屢試優等。居庭課子，義方式穀，里中稱爲盛德。卒年六十有六。著有《四書辨解》，未鐫散失，至今惜之。

方學述 字月潭。父卒，時甫十歲，無殺禮，哀毀獨至。生平好義，族中丞大任，以忤璫坐論罰金，不貲，首捐五十金，爲宗黨倡。鄰人韓桂困於債，家不克有其婦，賴學述代償以免之。又嘗身任禍患，脫貧佃朱天父子於豪貴人手。生六子，皆有文行，而郡諸生大全字汝棠者，尤稱白眉。嘗客江右撫軍幕，活里民從戎者數百人。善草書，篤風義，以仁孝聞，蓋是父是子也。

楊言 字君謨。邑諸生。操履端方，舉足如繩，無側視返顧。行已接物，一衷於義理。里人信之。

倪夢槐 字仲信。萬曆間明經。司訓銅陵，後遷巢教諭。盤殮苜蓿，不異諸生時。已而嘆曰：「爲寒穉碌碌風塵，豈不重爲淵明笑哉？」致仕歸。年八十一卒。夢槐性端方，燕處無惰容，雖割肉、剖瓜，必方正始食，其嚴毅不苟類此。子應奉，以諸生授徒，慎取與，重然諾，力學敦行，一如其父，後進多宗之。

汪沼 字昆源。糴穀不畀賈客，惟給遠近貧人，直視常寧減，而金之美惡勿問，但封貯署名，聽人執籌自取。糴盡日，始一省驗其直，或投以贗物，即棄之流水，未嘗再言。一日，廩既竭而穀復盈，亦一異也。萬曆乙丑歲荒，賑粥數月，以槽櫝瘞死者，存歿攸賴，不可勝記云。

周熾 字心一。初治經生業，既詘於有司，遂棄去。型仁講讓，求爲善人。兄耀久析居，其產中落，遂食於熾，以終身焉。崇禎間，御史行部，問桐之隱德者，父老會舉熾爲應。縣令辜朝薦、楊爾銘後先延致賓筵。其子康祀，以才能應徵召；孫孚先，力學工文，亦長厚之報云。

鄧森楷 字自牧。性木彊，陰行善。崇禎辛亥大飢，貯穀數百石，盡散諸田里。偶居于鄉，有鄰婦夜奔寢室，正色拒之，詰旦托故去，垂老戒子孫，始洩其事。少讀書穎慧，尤精小品，善隸書。子焄、燁，俱庠生。

趙甫 字良贊。嘗使僕徵子錢於里人，里人怒毆之，遂死其家。里人將經一子以抵甫，甫曰：「死者不復生，而更死生者，是重傷也。」遺書曰：「僕死，煩若爲我瘞之。」

吳一卞 字元和。邑諸生。年十四，口吮父疽。家政最肅，既舉子，則撫孝順陰隲事實爲里巷之謠，使之習誦。尤篤於宗族，嘗建祠，置祭田，屬其子應必，世世勿變。三黨中婚嫁、殯葬力不能舉者，輒以身任之焉。

蔡如澤 號百泉。崇禎間廩生。性拙訥寡言，而以帖括授徒，誘掖有方，雖倥^{〔一〕}侗者，聆其提^{〔二〕}訓，亦覺豁然心開也。每日端坐函丈，學子環列，量質定課，課未畢，即跼步弗移。其督課之勤，蓋近世經師所僅見者，以故門下成材甚盛，有官至侍從者，如澤未嘗自伐其能也。平生除咕嗶外，世情人事，漫置不省，識者緣此益重之。年六十，依次當貢，輒先請老。又十三年而卒。

彭湯 字兩全，孝子寶之後也。性方嚴，不苟訾笑。里中兒好訟者，湯以理折之，曲直立判。以故人不畏郡邑之法，而畏湯之一言，有王彥方之風焉。

潘益 字公涉。事生母郭氏並嫡母湯，倍極孝思，兩母爲之雍睦有如姊妹。同母弟天昌家落，益經理其生產，俾得無乏，始終不倦。後爲建安學博，即以施於家者教邑之子弟焉。

何如達 字孟章。性溫和，生平無疾言怒色。兩弟皆貴顯，宦遊京邸，如達居家，恬淡自處，獨博母歡，不通一刺於當事。時有賢良方正之詔，郡邑上其名，力辭不就。晚舉鄉飲，不得已一爲出應。卒年七十有四。

王嘉璿 字堦鳴。七歲通六經，十歲能屬文，自成一家言。弱冠即延就鄉塾，作人楷模。會歲侵，盤館穀煮糜以活飢人。里有盜牛者，爲輸金免其罪，曰「飢寒迫之耳」，其人卒改行爲善焉。子彭年，既登鄉薦，猶手不釋卷。其篤勵如此。

〔一〕倥：底本作「倥」，今據康熙姚志校改。

〔二〕提：底本字跡磨損，今據成文本和康熙姚志校訂。

倪應奉 字雲儀，夢槐子也。折節讀書，補博士弟子。嘗（一）於呂泉之東建洗心會館，朔望講學，一方向道者宗之。生平嚴於檢身，取與然諾，一秉於理。鄉鄰有索負者，即解囊以息爭，終不取償。又曾脫人於難，竟不令之知。子傳提，躬端謹，舉優行，與修邑志。著有《讀易齋詩文》十卷。

倪自治 字景心。少工制舉業，遊郡庠，試輒高等。與弟自清，一時才名有機、雲之譽。崇禎癸酉，以明經初授溧水訓導，陞徐州學正，致仕歸里。自治賦性端方，取予必嚴一介，有所諾，生死不異。里人高其文行，爭延爲師，而教法一律以嚴，其門徒雖列子衿，猶不能寬於夏楚。及司鐸，即以里塾之教教兩學諸生焉。

楊胤昌 字蘭似。負異敏，工文藝，弱冠補弟子員。孝親篤友，賑貧乏，濟急難，行敦古處。年八十有三卒。著有《歷試聞吟諸草》。里推文品兼優云。

國朝

何應琯 字朗生，方伯如申第四子。務敦行誼，淡泊自守。常着布袍，浣至敝，猶不易。邑令辜朝薦聞而賢之，欲得一面，琯終不往。篤於友愛，有姊適倪，蚤孀，時當荒亂，琯與仲兄璿輔之以成其節。妻盛氏，柔嘉爲性，亦壽七十有五，人以比鹿門夫婦云。

鄧元盛 字二言。籍諸生。端方耿介。與弟元炤，元聲友愛最篤。少館於巢，夜有一婦叩門乞火，叱之不納，詰旦察之，知爲鄰孀也，絕口不向人言。遇歲歉，輒出穀賑貧，里人爲樹幟以揚之。崇禎乙亥，流寇犯桐，闔邑募餉，盛輸金以倡。知縣楊爾銘議遷關廟，尋以行取去，捐貲托盛卒事，纖悉無苟。七旬，丁母艱，跽踊號泣如孺子。其弟元炤，工舉業，曾中副車，偏負義氣，元聲，刲股愈親疾，以孝著稱。一門雍睦，有足多者矣。年八十二卒。妻尹氏，性慈好善，年九十有五，尚彊健，邑人奉爲壺瑞云。

何應璿 字子政，方伯如申仲子。生而純篤，不爲矯情飾貌。少善文，與兄應瓊齊名。兄弟同居，終其身未失溫愉之色。及瓊死，

（一）嘗：底本和成文本字跡磨滅，今據康熙姚志、康熙桐城志校補。

無子，囑以田產授諸弟，璿一切置之不問，獨檢瓊爲里中陳「兵賊交訐籲天請蠲」一劄子，其友愛如此。晚夢異人贈圖書，鐫「淡然若石」四字，遂號淡石。年六十六。著有《聽梧軒集》，藏於家。

楊駿字楫汝。少失恃，哀毀過禮。長列諸生，三十餘年足跡不入公室。坦衷曠度，與物無競，遇拂逆相加，輒曰：「彼未嘗有過，或待之未至爾。」生平尤淡於財利，食貧屢空，晏如也。父宗億令督家政，絲粟不私。晚與仲季析箸，田產取瘠，奴婢取老，曰：「吾子既多且長，稍克自立，若輩子幼，非藉先業難存也。」及子臣鄰登賢書時，駿猶及見之，第期其異日入仕，當爲清白吏報國云。

李在公字未盡。好陰行善，嘗建殯菴，撿枯骨瘞之。明季壬午年間，寇逼城閉，兼疫疾甚行，屍橫街衢。在公備棺席，日出數百，埋于郭外，計一萬七千餘軀^(一)。又率諸生登陴防守，晝夜罔懈，皖撫題爲功貢。後以好施家落，築室龍眠山，著書樂道，於康熙丁未年卒，壽七十有五。

吳季鵬字予翮。事孀母極孝。明季寇逼，捐木數百株，爲守城費，邑令賢之。苟利地方，不避嫌怨，言之侃侃，以莊嚴見憚一時。人有侵其地者，含忍不發。有所負弗能償者，遂焚其券。中年雖歷任別駕，而竟恬退以老。卒年八十有一。

石韞光字瓊甫。性真率好義，曾活九人於獄。妻高氏，能相夫行善。初，光之葬親，甫八歲，臨穴盡哀，有孝名。後光患癰，需生螺不得，長子綱，亦八歲，鑿冰得螺，以愈父疾。康熙乙丑，太守劉樸敦請鄉飲，旌以扁。

胡瑀字太函。年十九，即聲著膠庠，萬曆間中副榜。生平砥志立節，敦行善事，曾舉德行於督學，敦請鄉飲者三。明季避寇西山，賊縱焚，而所居獨完。一日，賊突至，倉皇抵山間，賊搜殺此山，獨大霧三日不見。亟奔城，遇賊騎，舉家伏道待擒，忽見山麓有女子數人，現身穿林，賊赴山，得免於難。善人之報也。順治甲午，年九十歲，無疾而卒。

王大惠字均海。少與阿弟願五共事祖父母，極盡孝養。同堂兄弟十人，同食同居，久不析箸，鄉里稱爲義門，大惠敦睦之誼居多也。崇禎壬午間，飢疫薦臻，積屍枕藉，大惠施棺瘞之。年近五十，未生子，時以爲憂，夜夢神人慰之曰：「爾好義既同純仁，何患無嗣？」未幾，果誕子匡，英年即噪聲膠序間。願五居官數十年，大惠曾不以私事相干，惟勗其以清白貽子孫而

(一) 一萬七千餘軀：康熙姚志、康熙桐城志均作「大小七千餘軀」。

已。年八十餘歲，無疾而逝。

吳道亨 字約之。事後母篤孝，親嘗湯藥。兄弟五人析箸，亨獨竭力養親，不累諸昆季。督家政四十年，纖毫不私。建祠置田，老有存恤，幼有膏火，耕有補助，賻贈婚喪，一邑皆以爲法。子德秀，有父風。

吳道坤 字平之，卽道亨之兄。少補博士弟子，輕財好施。嘗因無子買妾，甫入門，妾言所以，坤遂贈裝遣還。至橋梁津渡缺圯，及寒無衣，負無償者，坤尤多方濟之，鄰里高其義。

吳德秀 字真來。邑庠生。少遇母疾，思食魚，際綏寇之亂，三星在罍之時，遍求不得。忽於小澗踴出巨鱗，烹而進之，效過於藥，人稱孝感。每遇年飢穀貴，秀必平價糶之，或買貴賣賤，或春借秋取，鄉里好義者亦效爲之，全活窮黎甚衆。至尊祖睦族、隆師敬友，其事難枚舉焉。

左 藻 字子畏。性篤實。康熙癸酉，舉于鄉，需次中翰。生平樂善好施。捐資成雙溪橋梁，瘞枯骨於蛟臺，人有鬻女者，代贖之，歲暮賑給，親黨多倚賴焉。卒年七十有五。

姚孔鐔 字振修，號荆啓，大司寇端恪公孫，羅田令士基子。負雋才，年二十，舉康熙庚午鄉試，需次縣令。數歲時失母，擗踊中禮，長而孺慕不衰，每上塚，必涕洟竟日。父在官暴病，鐔心動，衝暑往省，至一日而父歿，得親含殮，羅士民嘆異之。父有帑負千餘金，鐔鬻私產以償，不耗諸弟貲。共養後母，纖悉稱其意。端恪妾張氏，年少失志，無子，鐔奉之如母，數十年無間，頌言其節，蒙學使者題旌。病亟，目將瞑，兩椰子牽衣泣，不顧，母至，執其手，輒開睫，淚下被面而絕。

都先覺 字依衡。郡廩生。有至性。父母有疾，從侍，衣不解帶，對人言必泣下。友愛其弟，衣食之，爲娶婦。家貧力學，授經於外。父母所欲，必力致之，意稍不懌，則長跪終日，必俟其顏霽而後起。年二十有八卒。

姚孫枝 字宜孫，號蓬庵。早孤，事母鄭以孝聞。鄭暴卒，不及召醫，遂自矢雖疾病不藥。父名蓮，終身不食蓮實。爲族長，繩族子以禮法。其婚嫁逾時者，輒屬其姪大司寇文然分俸完之。歲凶則科其有餘者，令出粟以食乏者。嘗貸米三十斛至，值隣有喪不克舉，周以其半，來春咽麥粥自如。少工舉子業，既讀其曾祖《克齋語錄》，遂專心濂恪之學。家居講授，稱大師。子焜，副貢生，以才行稱克家。